

四明叢書

張宗祥

不盡同閩中頒詔之使至議開讀禮張公國維與熊公
汝霖爲一議朱公大典與忠介爲一議公出揭以爲當
如張公之言因請自充報使入閩以釋二國之嫌王從
之及自閩還累有建白不見用江干之破也公泛海入
翁洲道逢富平將軍張名振扈王入閩公從之旣至招
討使鄭成功以前頒詔之隙修寓公之敬於王而不爲
用公勸名振還石浦招散亡以謀再舉乃偕還王加公
右僉都御史時威虜侯黃斌卿守翁洲名振以石浦之
軍與爲犄角明年松江提督吳勝兆請以所部來歸斌

卿心不欲往而故都御史沈公廷揚御史馮公來第與公勸名振應之遂監其軍以行至崇明大風覆舟沈公死之公與名振皆被執有百夫長者識公導之使走乃得至公之故壬午房老知諸暨縣錢氏七日間道復歸翁洲時忠介已奉王出師於閩浙東之山寨亦羣起遙應之公乃集義從於上虞之平岡山寨之起也因糧於民民始以其爲故國也其餉之而其後遂行鈔掠民苦之其不以橫暴累民者祇李公長祥東山寨王公翊大蘭山寨與公而三履畝輸賦餘無及焉庚寅閩師潰諸

將以王保翁洲名振當國召公以所部入衛加公兵部
右侍郎兼官如故辛卯浙之提督田雄總兵張杰海道
王爾祿並以書招公公峻詞拒之是秋大兵下翁洲名
振奉王親擣吳淞以牽制舟山之師拉公同行翁洲陷
公扈王再入閩次鷺門時鄭成功軍甚盛旣不肯奉王
諸藩畏之亦莫敢奉王而公獨以名振之軍爲王衛時
時激發諸藩使爲王致貢然公極推成功之忠嘗曰招
討始終爲唐眞純臣也成功聞之亦曰侍郎始終爲魯
豈與吾異趨哉故成功與公所奉不同而其交甚睦癸

已冬復閒行入吳淞專招軍於天台次於翁洲明年軍
於吳淞會名振之師入長江趨丹陽掠丹徒登金山望
石頭城遙祭孝陵三軍慟哭失聲烽火達江寧時上游
故有宿約而失期不至左次崇明甲午再入長江掠瓜
洲復儀真抵燕子磯而所期終不至復東下駐翁洲是
役也故誠意伯劉孔昭亦以軍會或曰孔昭南都之亂
臣也公何以不絕之公曰孔昭罪與馬阮等然馬阮再
竄浙東而孔昭以操江親兵栖遲海上者蓋累年矣則
其心尙有可原倘疾之已甚使爲馬阮浙東之續將何

補乎聞者服之是年名振卒遺言以所部付公自公平
岡入衛之後部下不滿三百至是始盛乙未成功貽書
於公謀大舉丙申公軍於天台是冬軍於閩之秦川丁
酉大兵遷翁洲之民公還軍翁洲時王已去監國號通
表滇中戊戌滇中遣使加公兵部左侍郎兼翰林院學
士江督郎廷佐以書招公公峻詞拒之是年七月成功
以師會公北行仍推公爲監軍治舟羊山羊山多羊見
羊馴擾不避然不可殺殺之則風濤立至至是軍士不
信而烹之方熟而禍作碎船百餘義陽王溺焉復還軍

翁洲治舟明年五月成功會公於天台悉師以行游軍
至於鄞之東鄙師次崇明公曰崇沙江海之門戶也有
懸洲可守不若先定之以爲老營倘有疏虞進退可依
也不聽而請公以所部爲前軍向瓜洲時大兵於金焦
閒以鐵鎖橫江所謂滾江龍者也譚家洲岸皆西洋大
礮雷鉤而公孤軍出入其閒成功遣水師提督羅蘊章
以所部助公又令善泅水者斷滾江龍而支軍進奪譚
家洲礮相約滾江龍旣斷則公卽進踞上流奪其木城
以夾擊之滾江龍雖斷然舟多應礮而沒不得前公登

柁樓焚香祝天飛火夾船而墮遂以十七舟竟渡公渡而譚家洲守礮者亦走木城俱潰操江都御史朱衣祚被擒明日成功始至城中出戰不利提督管效忠走攻城克之議師所向成功欲直趨江寧公請先取鎮江成功恐江寧之來援也公曰吾但以偏師水道薄觀音門彼將自守不暇何援之爲成功卽請公行未至儀眞五十里士民迎降六月二十七日成功來告鎮江之捷公兼程晝夜進次日抵觀音門而致書成功請以步卒陸行赴白下時江督卽廷佐懼甚不意成功卒以水道來

大兵之征黔者凱旋聞信倍道而至請同守城於是嚴
備已具七月朔公哨卒七人乘虛入江浦初四日成功
水師方至次日公所遣別將以蕪湖降書至成功謂蕪
湖爲江楚所往來之道請公往扼之公頗以成功年少
恃勇爲憂欲留軍中與之共下江寧而後發辭之不得
乃至蕪湖相度形勢一軍出溧陽以窺廣德一軍鎮池
州以遏上流之援一軍拔和州以圖采石一軍入寧國
以逼東道休歎諸城大江南北相率來歸其已下者微
州寧國太平池州四府廣德和無爲三州當塗蕪湖繁

昌宣城寧國南寧南陵太平旌德貴池銅陵東流建陽
青陽石埭涇巢含山舒城廬江高淳溧水溧陽建平二
十四縣初公之至蕪也兵不滿千船不滿百但以大義
感召人心而公師所至禁止鈔掠父老爭出持牛酒犒
師扶杖拄香望見衣冠涕泗交下以爲十五年所未見
潁江小艇載果蔬來貿易者如織公軍人以船板援之
而上江濱因呼爲船板張公之軍公所至城邑入謁先
聖遭臣故老赴見者角巾抗禮撫慰懇至守令則青衣
待罪考其政績而去留之遠方豪傑延問策畫勉以同

仇多。有訂師期而去者。日不暇給。於是徽州降使方上
謁。而江寧之敗。聞至。初。公貽成功書。以師老易生。他變
宜遣諸將分取。旬容丹陽諸城邑。如白下。出援。則首尾
夾擊之。如其自守。則堅壁以待。倘四面克復。收兵。日至
白下。在掌中矣。成功以累捷。又聞江北如破竹。謂城可
旦夕下。雖有遺水師提督羅蘊章招撫吳會之命而未
行。但命八十三營牽連立屯。設雲梯地雷。并造木柵。而
蘇松總兵梁化鳳等。以馬步兵相繼至。浙之駐防兵亦
來援。長驅入城。莫之遏者。前鋒將余新銳而輕士卒。樵

蘇四出營壘一空化鳳謀知之以輕騎襲破前屯擒新
以去成功倉卒移帳質明軍竈未就大兵傾城而出諸
營瓦解成功之良將甘輝亦以馬蹢被擒死之軍遂大
崩初議取崇沙甘輝之言與公合及議遏蘇常援兵輝
言亦與公合而成功皆不聽以致敗公之聞信也以爲
雖敗未必遽登舟雖登舟未必遽揚帆雖揚帆亦必入
鎮以圖再舉故彈壓列城祕不使諸將知而更貽成功
書以爲勝負兵家之常乞益百艘以相助不知成功并
撤鎮江之師竟入海先是鎮江之捷漕督以師援江寧

中道溺死松帥馬逢知密以書請降其自巡撫而下皆
出走故公勸成功持久以觀變旣不得請江督郎廷佐
等復以書招公公峻詞拒之廷佐乃發舟師以扼公歸
路期必得公而後已公與諸將議以下流已梗而九江
一帶尙未知我之敗我麾下已萬餘前此豪傑來見者
又多成約不如直趨鄱陽招集故楊萬諸家子弟以號
召江楚八月七日次銅陵與大兵之援白下者遇公奮
擊敗之沈其四舟是夕大兵以不利引而東下礮聲轟
然而公軍誤以爲來擊營遂潰或勸公入焦湖慈谿義

士魏公遮道說公以爲焦湖入冬水涸不可駐軍而英霍山寨諸營多耕皆識其魁請入說之使迎公乃焚舟登陸士卒願從者尙數百人十七日入霍山寨已受撫不納乃次英山甫度東溪嶺而追至士卒紛竄相依止一童一卒迷失道賂土人爲導變服夜行天明而蹤跡者多導脫身去又以賂解散諸蹤跡者然而茫然不知所之念有故人賣藥於安慶之高河復賂一土人導以往至則故人適他出而其友有識公者蓋亦觀變從江上來至安慶者也遂導公由樅陽出江渡黃湓抵東流

之張灘陸行建德祁門中公方病瘡力疾零丁至休
寧賁棹入嚴陵又恐浙人之多識之也改而山行自東
陽義烏以出天台公之在途中也海上人未知所向或
曰抗節死安慶或曰殞英霍山寨中或曰爲浮屠矣父
老多北面泣下者及聞公至婦女皆加額壺漿迎之人
謂是役也以視文丞相空坑之逃其險十倍過之而其
歸則郭令公之再至河中也遂駐節天台樹纛鳴角故
部漸集成功聞公還亦喜遣兵來助公公巡視天台海
上有長亭鄉者多田而苦潮乃募諸義民築塘以捍之

至今猶蒙其利乃遣人告敗於滇中且引咎滇中賜公
專勅慰問加官尙書兼官如故明年移師林門尋軍於
桃渚時大兵兩道入海討成功皆失利而成功以喪敗
之餘雖有桑榆之捷不足自振乃思取臺灣以休士公
聞之不喜辛丑引軍入閩次於沙關成功已抵澎湖公
遣幕客羅子木以書挽成功謂軍有進寸無退尺今入
臺則將來兩島恐并不可守是孤天下之望也成功不
聽成功雖東下而大兵尙忌之懼其招煽沿海之民於
是有遷界之役沿海之民不願遷大兵以威脅之猶遲

延不發公頓足歎曰棄此十萬生靈而爭紅夷乎乃復以書招成功謂可乘此機以取閩南成功卒不能用公遺書故侍郎王公忠孝都御史沈公佺期徐公孚遠監軍曹公從龍勸其力挽成功而卒不克公孤軍徘徊兩島要其劉琨祖逖之志未嘗一日忘也而滇中事急公復遣子木入臺苦心責成功以出師成功方得臺不能行公乃遣職方郎中吳鉏挾帛書間道入鄖陽山中欲說十三家之軍使之撓楚以救滇十三家已衰敝不敢出師王寅滇中遂陷成功亦卒於臺公哭曰已矣吾無